



Fidoyilik —
Vatanga xizmat demak!

2023-yil 15-avgust, seshanba,
97 (23.818)-son

**KUN
HIKMATI**

Rahbarning mahorati,
farosati, fidoyiligi
huzuriga kelgan kishi
talabini qondirishda
emas, balki uning ana
shu ehtiyojini avvalroq
anglashida bilinadi

1913-yil aprel oyidan chiqqa boshlagan



www.zarnews.uz



https://www.facebook.com/zarnews.uz



@zarnews_uz



https://twitter.com/zarnews_uz

YANGI HAYOT UCHUN, YANGI O'ZBEKISTON UCHUN!

Hozirda viloyatimizda 128 mingdan ortiq tadbirkorlik subyekti faoliyat yuritmoqda. Ishbilarmonlarning murojaatlari bilan ishlash va ularga yechim topish maqsadida viloyatda har hafta tadbirkorlar qabuli o'tkazib kelinmoqda.

Tadbirkorlar muammolari o'rganilmoqda

Davlatimiz rahbarining tadbirkorlar bilan ochiq muloqoti oldidan ulardan kelayotgan murojaat va takliflarni o'rganish maqsadida viloyat hokimligi qoshida shtab va Call-markaz tashkil etildi.

O'z navbatida Investitsiya va tashqi savdo vazirligi Savdo-sanoat palatasi va biznes-ombudsman bilan hamkorlikda 1094 raqamli Call-markaz faoliyati yo'lga qo'yilgan.

Joriy yilning 9-avgust sanasigacha viloyatimiz tadbirkorlaridan 382 ta murojaat tushdi, - deydi Prezidentning tadbirkorlar bilan ochiq muloqoti viloyat shtabi a'zosi Otabek Ahadov. - Murojaatlarning 240 tasi o'rganib chiqildi va 187 tasi ijobiy hal etildi. 52 ta murojaat rad etilgan bo'lsa, 142 tasi o'rganish jarayonida. Murojaatlarning 70 ga yaqini bank sohasiga, 30 dan ziyod shahar va tuman hokimliklariga tegishli bo'ldi. Ko'proq kommunikatsiya tarmoqlari, eksportni oshirish, bu boradagi tizimli muammolarni hal etish bo'yicha taklif va tashabbuslar bildirilmoqda. Murojaatlar tumanlar kesimida boshqa hududlarga nisbatan Samarqand shahri, Narpay, Urgut tumanlaridan ko'p qayd tilmoqda.

O'ktam XUDOYBERDIYEV.

Yangi GESlar

aholining elektr energiyasiga bo'lgan talabini qondira oladimi?

Elektr energiyasi ishlab chiqarishda qayta tiklanuvchi energiya manbalaridan, xususan, mavjud suv salohiyatidan samarali foydalanish, kichik va o'rta quvvatdagi GESlarni ishga tushirish muhim yechim hisoblanadi.

Rivojlangan davlatlar atom va issiqlik elektr stansiyalaridan voz kechib, GESlardan ko'proq foydalanishga harakat qilmoqda, - deydi "O'zgidroenergo" aksiyadorlik jamiyati 1-son qurilish direksiyasi bosh mutaxassisi Abdulaziz Tojiyev. - Prezidentimizning 2022-yil 9-sentabrda «Energiya tejavchi texnologiyalarni joriy qilish va kichik quvvatli qayta tiklanuvchi energiya manbalarini rivojlantirish bo'yicha qo'shimcha chora-tadbirlar to'g'risida»gi farmoniga asosan, viloyatda ham 16 ta kichik GESlar qurilishi ko'zda tutilgan bo'lib, kelajakda mavjud suv resurslaridan foydalanib, gidroenergetika quvvatlarini oshirish o'ta muhim vazifa hisoblanadi.

Bugungi kunda viloyatimiz hududidan oqib o'tuvchi Darg'om kanalida ikkita kichik GES qurilib, foydalanishga topshirildi. Jumladan, Toyloq tumanidagi Navzandak mahallasi hududida qurilgan Shovdor GESi elektr energiyasi ishlab chiqarimoqda. Joriy yilning may oyida ishga tushirilgan mazkur kichik gidroelektrostansiya "TVYeA" kompaniyasining (Xitoy) 15 million dollarlik investitsiya mablag'lari

hisobidan qurilgan bo'lib, uning 2 ta gidrogeneratorlari soatiga 7,2 MVT tok ishlab chiqarish quvvatiga ega.

Yangi qurilgan GESlardagi zamonaviy avtomatlashtirilgan qurilma va gidrogeneratorlarni ishlatish juda qulay bo'lib, inson omilini sezilarli kamaytirishi bilan eski GESlardan butunlay farq qiladi, - deydi "Shovdor-1" GES boshlig'i Farhod Tohirov. - Butun boshli GES kompyuterlar yordamida boshqariladi. Biror joyda no-sozlik paydo bo'lsa, zamonaviy dasturlar orqali aniqlab, zudlik bilan sozlaymiz. Ayni vaqtda to'g'on orqali soniyasiga 80 kub suv o'tadi. Bu esa 10 ming xonadonni elektr energiyasi bilan ta'minlash uchun yetarli tok ishlab chiqarish imkonini beradi.

Mana, to'rt oydirki, kanalning Elipok mahallasi hududida ham "TVYeA" kompaniyasi mablag'lari hisobidan "To'palang HPD xolding" MChJ quruvchilari tomonidan qurilgan "Shovdor-2" GESi ham aholi uchun elektr toki yetkazib beryapti.

(Davomi 2-sahifada) >>>

II MDH o'yinlari: sportchilarimiz 17 medalni qo'lga kiritdi

4-14-avgust kunlari Belarus poytaxti Minsk shahrida II MDH sport o'yinlari bo'lib o'tdi.

O'n kun davom etgan musobaqada birinchi o'rinni 288 ta medal bilan rossiyalik sportchilar, ikkinchi o'rinni 236 ta medal bilan mezbonlar egalladi. Uchinchi o'rinni 28 ta oltin, 25 ta kumush, 53 ta bronza, jami 106 ta medal bilan o'zbekistonlik sportchilar qo'lga kiritdi.



Musobaqada yurtimiz sharafini himoya qilgan samarqandlik sportchilar 4 ta oltin, 2 ta kumush, 11 ta bronza medaliga ega chiqdi. Jumladan, og'ir atletika bo'yicha Og'abek Nafasov, dz-yudo bo'yicha Azamat Oblaqulov, boks bo'yicha Gulsevar G'aniyeva hamda Shavkatjon Boltayev oltin, muay-tay bo'yicha Anisxon Hakimov va boks bo'yicha Sanobar Bozorboyeva kumush medallarga sazovor bo'ldi.

Shuningdek, 11 nafar sportchimiz og'ir atletika bo'yicha Temurbek Nasimov, muay-tay bo'yicha Davlat Shamsiyev, Rahmatjon Xodjayev, futbol bo'yicha (jamoaviy dasturda) Damir Mamadoliyev, kamondan otish bo'yicha (jamoaviy dasturda) Jasmina Nurmanova, Omina Ergashova, gandbol bo'yicha (jamoaviy dasturda) Lobar Shamiyeva, sambo bo'yicha Dilmurod Xolmamatov, yunon-rum kurashi bo'yicha Elnur Xolmominov, Alijon Aliyev, Abror Nurmanov bronza medallarni qo'lga kiritdi.

Turkiyalik yoshlar Samarqandda bo'ldi

Joriy yilning 16-mart kuni Prezidentimiz Sh.Mirziyoyev raisligida Anqara shahrida o'tkazilgan Turkiy davlatlar tashkilotining navbatdosh tashqari sammitida turkiy davlatlar yetakchilari favqulodda vaziyatlarni boshqarish va gumanitar yordam ko'rsatish sohasida ko'p tomonlama hamkorlikni rivojlantirish istiqbollari hamda tabiiy ofatlarning oldini olish va oqibatlarini bartaraf etish masalalarini muhokama qilgan edi.



Davlatimiz rahbari sammitda so'zlagan nutqida Turkiyaning Hatay viloyati yoshlarining O'zbekistonga tashrifini tashkil qilish, ularning mazmunli hordiq chiqarishlari hamda qadimiy Samarqand, Buxoro va Xiva shaharlariga safarini uyushtirish, yurtimiz yoshlari bilan qo'shma tadbirlar o'tkazish taklifi ham ilgari surilgan.

Kecha Turkiya Respublikasining Hatay viloyati yoshlari Samarqandda bo'ldi.

Yoshlar markazida hataylik va samarqandlik mas'ullar hamda volontyor yoshlar ishtirokida "O'zbekiston-Turkiya yoshlarining birdamligi" mavzusida davra suhbat tashkil etildi.

- Joriy yil fevral oyida Turkiyaning janu-

bi-g'arbiy hududlarida ro'y bergan vayronkor zilzilalar ko'plab qurbonlar va talafotlarga sabab bo'ldi, - deydi Turkiya Yoshlar va sport vazirligi mas'uli Serhat Sag'ichn. - Shunday og'ir damda qardosh o'zbekistonliklar mam-lakatimizga birinchilar qatorida yordam qo'lini cho'zganidan minnatdormiz. Yurtboshingiz taklifi bilan bir guruh yoshlarni zaminigizdagi tarixiy shaharlarga sayohatini boshladik. Bugungi uchrashuvda volontyor yoshlar bilan suhbatlashib, tajriba almashdik, qolaversa, yoshlarimiz madaniy hordiq chiqardi. Do'stligimiz va hamkorligimiz abadiy davom etadi.

O'z muxbirimiz.



EKSPORT MAHSULOTLARI (tegishli yillarning amaldagi narxlarida)

1996-yilda -
135,5 milliard so'm
2022-yil yakuni bilan -
586,1 million dollar

OTAMNING QATTIQQO'LLIGI MENGA JASORAT BAG'ISHLAGAN

↓ Yoshlar hayoti

Mahallamiz bolalari futbol o'ynaganda men ham ularga qo'shilib yugurdim, koptok tepgim kelardi. Uyda, yakka tartibda ta'lim olishni emas maktabga borib o'qishni istardim.

Oyoqlarimda nogironligim bilan tug'ilganim sog'lomlardek hayot kechirishga to'sqinlik qilardi. Ota-onam esa yetarlicha ko'nglimga qarar, bor mehrini berib tarbiyalardi, ammo ortiqcha erkalamas edi. Ya'ni imkoniyatim cheklanganligini hisobga olib, xohlagan ishimi qilishga, vaqtimni behuda o'tkazishga yo'l qo'ymas edi. Menda boshqa bolalarga qaraganda bo'sh vaqt ko'p bo'lishi tabiiy edi. Telefon va u orqali internet tarmog'idan to'g'ri foydalanishimni ham nazorat qilishardi. Ayniqsa, otamning qattiqqo'lligi menga jasorat bag'ishlardi. Shu sabab vaqtimni behuda sarflamaslikka, hayot uchun kurashishga intildim. Yangiliklarni kuzatib, nimalarnidir o'rganishga, shu yo'l bilan o'zimni ovtushga harakat qilardim.

16 yoshimda ota-onamdan kompyuter jamlanmasi olib berishni iltimos qildim. O'zim tug'ilib o'sgan, Kattaqo'rg'on tuman Qo'shshovuz mahallasida aholiga kompyuter xizmatlari ko'rsata boshladim.

Bolaligimdagi "Nega men boshqa tengdoshlarimga o'xshamayman", degan o'ylar meni tark etdi. Chunki inson hayotda o'z oldiga maqsad qo'yishi va unga doim intilib yashashi kerak ekan. Avvaliga, kichik mag'lubiyatlarga ham uchrardim, ammo chekinmadim. Bu muvaffaqiyatsizliklar meni katta yutuqlar sari yetakladi.

Dastlab, taklifnomalar tayyorlab, to'y-marosimlarda esdalik uchun fotosuratga olish xizmatlarini yo'lga qo'ygandim. Mahallamizda paynet xizmatini tashkil qildim. Keyinchalik kompyuterda turli dasturlarda ishlashni va asosiysi, videomontajni o'rgandim. To'ylarda xizmat ko'rsatish uchun videostudiya tashkil qildim. Ishlarim yurishib ketdi. "Yoshlar daftari"ga kiritilganim uchun menga bepul noutbuk berildi. Bundan tashqari mahallamizdagi yoshlar yetakchisi maslahati bilan 33 million so'm kredit oldim. Tuman markazidan ijaraga bir xona olib, 3 nafar yoshni ishli qildim. Har kuni



ofisimga qatnash uchun elektroskuter sotib olganman. Kelgusida faoliyatimni kengaytirib, o'quv markazi ham tashkil etish niyatim bor.

O'zimni imkoniyati cheklangan, deb hisoblamayman. Avvalo, ota-onamning menga bergan tarbiyasi, shuningdek, ustozlarimning uyga kelib bergan saboqlari meni hayotda o'z yo'limga topishimga xizmat qildi. Qolaversa, keyingi yillarda mam-lakatimizda tadbirkorlik uchun yaratilayotgan imkoniyatlar hatto men kabi nogironligi bo'lgan yoshlarning ham birovdan kam bo'lmay yashashiga xizmat qilyapti.

Jo'rabek KARVONOV.

